

南宋古蹟考



南宋古蹟考

朱彭輯

中華民國二十四年十二月初版

朱

輯者 朱 彭

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

王雲五主編

叢書集成初編

南宋古蹟考

南宋古蹟考卷上

錢唐 朱彭 輯

城郭考

宋史高宗本紀建炎三年升杭州爲臨安府。紹興八年定都。心史云。宋行在十三門。咸淳志紹興二年霖雨城壞。二十八年增築內城及東南之外城。附于舊城。凡十三門。東曰便門。候潮。保安。新門。崇新。東青艮山。西曰錢湖。清波。豐豫。錢唐。南曰嘉會。北曰餘杭。水門五。曰保安。曰南水。曰北水。曰天宗。曰餘杭。元張翥蛻菴集有臨安故城圖詩。

城郭考總敘。後當有外城門名目。

便門 在東。紹興二十八年增築。又設西華。東便二門。游覽志候潮門在東而近南。宋時有便門。保安門。今廢。夢梁錄云。沿寨向南有便門。謂之東便門。萬歷杭州府志。候潮門外東爲期清坊。舊便門街。又云。宋瓦舍有便門瓦。

候潮門 在東方輿勝覽云。紹興三十八年。殿前都指使楊存中。乞通展皇城十三丈。以五丈作御路。六丈作民居。將來聖駕親郊。由候潮門徑從所展御路。直抵郊臺門外。擢木橋。夫差廟諸跡。錢唐遺事。高宗嘗宴大臣。忽見張循王有玉孩兒扇墜。上識是墜十年前往四明誤墮于水。屢尋不獲。乃詢張復遣根問。云于候潮門外陳宅廚娘買得。廚娘因破黃花魚得之。奏聞。上大悅。以爲失物復還之兆。

保安門 在東。俗名小堰門。考通江橋本名慶元橋。北爲太醫局。又東爲保安門。

新門 在東。俗呼草橋。都城紀勝云。城東新開門外有富景園。五柳園。癸辛雜志云。東都盛時。無賴男子以色圖衣食。吳俗此風尤甚。新門外乃其巢穴。皆傅粉盛粧飾。善針指。呼謂亦如婦人。其爲首者號師巫行頭。

崇新門 在東。俗稱薦橋門。今名清泰。當時門內有崇新橋。崇新巷。皆以城得名。夢梁錄云。仲春十五日爲花朝節。崇新門外長明寺建佛涅槃勝會。觀者紛集。竟日不絕。葦杭紀談。紹興中。臨安府崇新門鹿苑寺。乃殿帥楊存中特建。以處此地流寓僧人。一歲元宵。側近營婦連夜入寺觀燈。有殿司將官妻同一女觀燈。爲寺僧引入。宿于幽室。事覺。毀其寺。西湖志餘。宋時楊德溫居崇新門外。插枯竹以引辟荔。月餘枯竹復生。未幾其妾溺水死。明年竹園忽發兩岐。扶疎可愛。未幾其妹死。乃知反常之物。非吉兆也。夷堅志云。臨安薦橋門外米市橋之傍。有賣騏豆者。腰間生尾。長四尺餘。每用纏縛數匝。乃得出。常爲市中小兒窘迫。必求觀乃止。

東青門 在東。俗呼菜市門。在菜市橋東。今東青巷。卽城之舊址也。游覽志。門之左。宋有皇城司營。武安泉水甚佳。

指南錄序。皋亭山距脩門三十里。按脩門卽今艮山門也。

艮山門 在東。今俗呼壩子門。咸淳臨安志云。走馬塘在艮山。菜市門外。平坦可馳馬。故名。舊有花柳。號

城東新路。

錢湖門 在西。今塞。萬歷錢塘志云。在清波門南。內傍雲居山。門北有海子口。出城內諸山水。西湖游覽志。門之內有牙兵寨。虎翼營。教駿營。騏驎營。白鱸井。夷堅志。步司將狄訓練。五更至錢湖門。覺有物觸足。取視則一巨蟹。長三尺。形模怪醜。執送於家。坐假寐。夢一人綠袍軟幘。持手板揖曰。某乃西湖判官。清波門 在西。門外有流福水橋。咸淳四年建。以引湖水入城。亦稱暗門。故畫院劉松年居此。人稱暗門。劉陸游夜泛西湖云。騎馬出闇門。指此周必大二老堂雜志云。壬午三日己亥晴。與芮國器。程泰之。蔣子禮出闇門。上風篁嶺。高翥春日湖上詩。又有清波門外放船時句。泊宅編。建炎己酉。龜杭州清波門裏竹園山。平地湧血。須臾成池。腥聞數里。明年金人殺戮萬人。卽暗門竹園山也。

竹園山 臨安志云。在府治西南。吳山一脈。獨趨而北。隱隱隆起。陰陽家曰。爲治所主山。安撫趙與簾建閣其上。平鑑西湖。理宗御書竹山閣。後撫魏克愚徙其閣。而山漸弛爲平地。

陸游夜泛西湖示桑甥世昌 嗟我客上都。忽已見暮春。騎馬出暗門。眯眼吹紅塵。西湖爲賈區。山僧多市人。誰令汚泉名。只合加冠巾。黃冠更可憎。狀與屠沽鄰。麝酒肉氣。吾輩何由親。少頃一閒散。境寂鷗自馴。舉手邀素月。移舟來青萍。鐘從南屏來。殷殷浮烟津。鶴髮隱者歟。長樂取釣緡。畏冷不竟夕。恨此老病身。明發復擾擾。吾詩其絕麟。

高翥春日湖上 清波門外放船時。盡日輕寒戀客衣。花下笑聲人共語。柳邊橋影燕初飛。曉風不定棠

梨瘦。夜雨相連。薺麥肥。最憶故山春更好。夜來先遣夢魂歸。

僧揮寶月山作調寄訴衷情 清波門外擁輕衣。楊花相送飛。西湖又還春晚。水樹亂鶯啼。閉院宇。小

簾幃。晚初歸。鐘聲已遠。篆香纔點。月到門時。

仲殊

豐豫門 在西。亦名湧金。北宋名湧金。紹興築城。改爲豐豫。夢梁錄湧金池在豐豫門內。考資治通鑑。建炎二年。韓世忠敗苗翊。勤王兵入北關。苗傅劉正彥趨都堂取鐵券。擁精兵二千。夜開湧金門以走。蘇幼安秋堂墓志云。淳佑八年。柴秋堂望以上丙丁龜鑑下獄。趙京尹疏救之。放歸田里。設祖道湧金門外者。若鄭震。吳陵。葉元素。朱繼芳等。凡十三人。皆一時名流。俞德鄰次韻趙提舉詩云。湧金門酒甜如蜜。知當日湧金門酒亦甚著名。乾道臨安志。政和六年。郡守徐鑄以豐豫墮損。命鈴轄楊靖重建。頗極壯麗。榜曰湧金樓。

施樞湧金門外 柳絲舞困起炊烟。羅綺相催欲上船。貴冶亦知春有夜。暖沙還付白鷗眠。

貢性之湧金門外見柳 湧金門外柳垂金。三日不來成綠陰。折取一枝入城去。教人知道已春深。

張孝祥鷓鴣天詞 日日青樓醉夢中。不知樓外已春濃。杏花未濕疎疎雨。楊柳初搖短短風。扶畫鷁。

躍花驄。湧金門外小樓東。行行又入聲歌裏。人在珠簾第幾重。

錢塘門 在西。紹興二十八年增築。杭城西四門曰錢湖。清波。豐豫。錢塘。此錢塘名門之始。宋史歐陽守道以言罷。徒步出錢塘門。惟書兩篋而已。

王同祖湖上早行。錢塘門外買湖船。霧氣衝雲水接天。只有蘇堤金線柳。半籠斜日半籠煙。

嘉會門。在南通江路大街。後代猶存嘉會弔橋。游覽志云。馬倉巷北卽宋嘉會門。按宋紹興增築城外。名南門曰嘉會。時南門包絡宮門。最爲長展。西際慈雲嶺。東沿包山。其門偏在包山之下。夢梁錄云。嘉會城樓綯綵。爲諸門冠。蓋此門爲御道。遇南郊五輅從此幸郊臺。

陸游四鼓出嘉會門赴南郊齋宮。客游梁益半吾生。不死還能見太平。初喜夢魂歸帝所。更驚老眼看都城。九重宮闕晨霜冷。十里樓臺落月明。自笑蒼顏君勿笑。少年慣聽舜韶聲。

餘杭門。在北。成化杭州府志。杭城舊有十三門。惟餘杭門在北。不得出居人之櫓。亦名北關。岳珂有望北關門詩。宋史苗傅傳。苗翊馬柔吉以兵阻河。韓世忠率先鋒力戰。後與光世乘之。翊敗走。勤王兵入關。

王銍繫舟餘杭門訪西湖金輪寺參上人。北郭望西湖。微徑幾尋尺。淡與人意長。寒雲正無色。深尋幽禪居。步轉蒼山側。落葉不可記。遮盡山下石。師方無定居。我亦何以適。四海莽無歸。老矣山中客。百年熟機緣。還此共禪寂。語罷古今分。座上有陳迹。一笑視此生。何事非戲劇。開門納遙峯。暮雨一江白。茲遊非世逢。歸路晚蕭瑟。積陰迷曉昏。鐘聲報將夕。

姜夔出北關。吳兒臨水宅。四面見行舟。蒲葉浸鵝項。楊枝蘸馬頭。年年人去國。夜夜月當樓。傳語城中客。功名半是愁。

葉紹翁出北關一里詩。脫衣命僕洗塵埃。籬落人家未見梅。出得城門能幾步。船頭便有白鷗來。
張輯乙未之秋高郵朱史君錢唐北關舟中調寄祝英臺近。客西湖。聽夜雨。更向別離處。小小橋窗。香
雪照樽俎。斷腸一曲。秋風行雲不語。總寫入。征鴻無數。認眉嫵。喚醒岩壑風流。片沙有奇趣。羨煞秦
郎。淮海漫千古。要看自作新詞。雙鴛飛舞。趁月底。重修簫譜。
保安水門。在東。夢梁錄云。保安水門河通跨浦橋。與江相隔。游覽志茅山河入保安水門。過保安橋。過
軍橋折而北合流通江橋。

南水門

北水門

天宗水門。成化杭州府志。舊又有天宗門。俗呼爲小北門。余考水門卽在此地。萬曆府志。上堰在天宗
門外。咸淳志。南自天宗水門。餘杭水門。二河合於北郭稅務前。仁和縣志。天宗棧庫在天宗水門內。
餘杭水門。都城紀勝云。北關水門內有水數十里。曰白洋湖。

考元時。禁天下修城。以示天下一統。內外城隍。日爲居民所平。至正十六年。張士誠據有浙西。十九年。
發松江。嘉興。湖州。杭州。民夫復築焉。以舊城包山距河。故南北長峙。則自艮山門至清泰門以東。視舊
則拓開三里。而絡市河于內。自候潮以西。則縮入二里。南截鳳山門于外。故東西比舊差廣。東無便門。
保安二門。北增天宗。北新二門。□仍十有三。而南宋之城址。已不無更易矣。夢梁錄云。諸門內便門。東

青艮山皆甕城。水門俱平屋。其餘旱門。皆造樓閣。諸城壁各高三丈餘。橫闊丈餘。禁約嚴切。人不敢登。二老堂雜志。臨安土人諺云。東門菜。西門水。南門柴。北門米。蓋東門絕無居民。彌望菜圃。西門則引水注城中。以水舟散給坊市。嚴州。富州。富陽之柴。聚于江干。由南山入蘇湖。米則來自北關云。

內城門

南麗正門。咸淳臨安志云。紹興二年九月南門成。詔名曰行宮之門。三年詔梁汝嘉創廊廡於南門之內。鼠璞云。行在南內門名麗正。蓋取重離麗正之義。夢梁錄云。大內正門曰麗正。其門有三。皆金釘朱戶。畫棟雕甍。覆以銅瓦。鐫鏤龍鳳飛驤之狀。巍峨壯麗。光耀溢目。左右列百官侍班閣子。登聞鼓院檢院相對。悉皆紅杈子。排列森然。門禁嚴甚。武林舊事。冬至或元旦有事南郊。自嘉會門至麗正門計九里三百二十步。皆潮沙填築。其平如席。以便五輅往來。肆赦日。自文德殿詣麗正門御樓。夢梁錄云。駕詣景靈宮有大旗。名蓋天旗。立於麗正門外。咸淳志云。門外卽儀鸞司營。考雲麓漫鈔。麗正門以鳳凰山作案山。山盡處卽嘉會門。則知此門正對鳳山。其址至今可意度也。

北和寧門。在鳳凰山左。游覽志。般若寺卽和寧門遺址。夢梁錄云。內後門名和寧。在仁孝登平坊巷之中。亦列三門。金碧輝映。與麗正同。把守衛士嚴禁。如人出入。守闔人高唱頭帽號。門外列百僚侍班閣子。左右排紅杈子。左設閣門。右立百官待漏院。古杭夢游錄。自大內和寧門新路。南北寶玉。珍異及花果。時新海鮮。野味奇品。悉集于此。公主下降日。駙馬至和寧門易冕服。又云。院子小園子等人。祇直和

寧門外紅杈子。早市買賣。市井最甚。夷堅志。臨安內北門外西邊小巷民孫三者居之。每旦攜熟肉出。常戒其妻曰。照管貓兒。一日忽曳索出。到門。妻急抱回。見者皆駭。貓乾紅深色。無不羨嘆。浸達內侍之耳。竟以錢三百千取之。內侍欲調馴。安帖乃進。已而色澤漸淡。及半月。全成白貓。走訪孫氏。已徙居矣。楊萬里初夏清曉。赴東宮講堂。經和寧門外賞花市詩。剩雨殘風一向顛。花枝酒盞兩無緣。忽逢野老從湖上。擔取名園到內前。芍藥截留春去路。鹿蔥交上夏初天。衆紅半霎聊經眼。不枉皇州住二年。

東華門。夢梁錄。入登平坊沿內城。有內門曰東華。守禁尤嚴。內城向南。皆殿司中軍將卒立寨。名中軍聖下寨。門外俱有護龍水池。又云。士人赴殿試。入東華門。各行搜檢。方行放入。武林舊事。公主下降。先擇日宣召駙馬至東華門。引見便殿。及吉期。又至東華門用鴈幣。

考登平坊。舊在清平山巷。對清平山。卽今高士坊巷。斜對六部橋。宋六部二十四司卽在此地。

西華門

據武林舊事。增入咸淳臨安志所載。惟有南北東三門。

考咸淳臨安志。紹興十八年。名南門麗正。北曰和寧。東苑門曰東華。二十八年。增築皇城。其城周迴九里。玉海云。紹興二年。南門成名曰行宮門。十八年。築皇城東南之外城。五百四十一丈。更名西南門曰嘉會門。文獻通考。高宗詔百官。特許乘轎。惟不入皇城。

王同祖夜步內門詩。靜夜高燈人未眠。等閒行過內門前。一聲唱徹連珠喏。碧月朱欄綠柳邊。

宮殿考

宋史地理志建炎三年閏八月高宗如臨安以州治爲行宮揮塵餘話云車駕初至臨安霖雨不止葉夢得言州治屋宇不多六宮居必隘窄上曰亦不覺窄但卑濕耳然自過江百官六軍皆失所朕何敢求安行在所錄紹興元年十一月詔守臣措置修內司乞造三百間詔減二百余考藝祖宮中止用赤白爲飾仁宗命欄楯撤去朱綠之采建炎間高宗至杭命內臣楊公弼徐康國勦行宮務使簡約去華飾遵祖制也乾道臨安志云紹興七年二月降詔巡幸建康府紹興八年三月移蹕臨安下詔曰昔在光武之興雖定都于洛而車駕往返見于前史者非一用能奮揚英威遍行天討上繼隆漢朕甚慕之朕荷祖宗之休克紹大統夙夜危懼不常厥居比者巡幸建康撫綏淮甸旣已申固邊圉獎率六軍是故復還臨安內修政事繕治甲兵以定基業非厭霜露之苦而圖宮室之安也故茲詔諭想宜知悉按徐一夔行宮考云今以地度之南自勝果入路北則入城環至德侔天地牌坊東沿河西至山岡自平陸至山岡隨其上下以爲宮殿雲鸞漫鈔政和五年東都築土山于景龍門之側以象餘杭之鳳凰山最高一峯賜名神運昭功封磐固侯亦名鳳凰山後神降有艮嶽排空霄之語以在都城之艮方故曰艮嶽南山成易名壽嶽都人且曰萬歲山所謂餘杭鳳凰山卽今臨安府麗正門之正面案山山之盡處卽嘉會門山勢自西北來如龍翔鳳舞掀騰而下至鳳凰山止分左右翼大內在山之左掖後有山包之第二包卽相府第三包卽太廟第四包卽執政府包盡處卽朝天門端誠殿在山之右掖後有山包之第二包卽郊壇第三包卽易安齋第四包卽馬院東南卽大江西爲西湖北爲平湖地險且壯實

一都會其先兆於東都爲山之時。

外朝正殿考

文德殿 紹興十二年建。行在所錄謂之正衙。六參官起居。百官聽宣布於此。宋史紹興十三年閏四月十七日。冊貴妃吳氏爲皇后。前期于文德殿內設東西房。東西閣。夢梁錄元旦禁中景陽鐘罷。百官皆冠冕朝服。諸州進奏吏各執方物之貢。諸外國正副賀正使隨班入賀。上御正衙。禁衛人高聲嵩呼。聲甚震。爲繞殿雷。百僚俱鞠躬聽宣。制曰。履茲新慶。與卿等同考。行在所錄凡上壽則曰紫宸殿。朝賀則曰大慶殿。宗祀則曰明堂殿。策士則曰集英殿。四殿皆卽文德殿。隨事揭名。

楊萬里文德殿聽麻仍拜表 蒼龍觀闕啓槐宸。白玉堦除振鷺羣。仗外諸峯獻松雪。霜前一鴈度宮雲。舍人就日宣麻制。丞相瞻天進表文。夙退自欣還自笑。素餐便當策殊勳。

紫宸殿 上壽之所。夢梁錄宰執親王百官過皇太后殿。上壽起居。舞蹈嵩呼。回詣紫宸殿宴。程史端慶節。上壽紫宸殿。百官皆賜食。余侍班南廊。老兵持二髹牌至。金書其上曰。輒入御廚。流三千里。周必大傳。上始以內禪意諭二府。二月辛酉朔。降傳位詔。翌日上吉服御紫宸殿。又考金國賀正旦使人亦宴於此。

魏了翁紫宸殿詩 珂繖搖心夢不成。忽聽吏早放衙聲。吹燈撥火供晨粥。趁到皇城卻六更。有次鞭鞘陸續鳴。赭袍當殿萬簪纓。羣臣拜舞分行坐。十味肴饈酒五行。蹴踘尋橦列廣廷。按絲吹竹布前

榮卿郎朵殿渾無見。只聽時時萬歲聲。蛾眉班捲戴花回。遙望君王玉色開。畫楯諸班謝茶酒。尻高首下一聲雷。

劉燭金國賀正旦使人到闕。紫宸殿宴。榆關玉塞靜無塵。嘉定於今第四春。兩國交馳通好使。八方同作太平人。翠鼙鼓奏娛佳客。白獸尊浮賞諫臣。聖歷欲茲天共遠。年年玉帛會楓宸。

大慶殿 朝賀之所。郊前三日。百官奏請。皇帝致齋于大慶殿。南渡典儀云。淳熙十三年。太上八十。正月元日再舉慶典。其日文武百僚集大慶殿。夢梁錄云。麗正門內正衙。卽大慶殿。遇明堂大禮。正朔大朝會。俱御之。又云。元旦朝會。駕坐大慶殿。有介冑長大武士四人。立于殿陛之角。謂之鎮殿將軍。殿西廡皆列法駕。鹵簿儀仗。龍墀立青涼繖十把。效太宗朝。列諸國王班次。如錢武肅。孟蜀王等也。宋史乾道元年立皇太子。十月十六日。皇帝御大慶殿行冊禮。皇太子服遠遊冠。朱明衣。執桓圭。前期習儀。明堂殿 宗祀之所。紹興四年八月壬寅。知臨安府梁汝嘉奏明堂行禮。殿成。九月辛酉祀明堂。行宮記作端誠殿。

夢梁錄。太廟在瑞石山。紹興間建。正殿十三室。十三室者。太祖。太宗。真宗。仁宗。英宗。神宗。哲宗。徽宗。欽宗。高宗。孝宗。光宗。寧宗。各一室也。咸淳添置一室。奉理廟神主。通爲十四室。皆正中。蓋終宋之世。未有祧廟也。前人未及有論者。攷中無太廟一條。姑附于此。

任希夷請御明堂齋殿。肇舉明禋預戒期。請臨齋殿御簾帷。廊頭萬旅皆花帽。殿下千官盡絳衣。玉輅

時嚴三歲禮慶霄遙望五雲飛。小臣頭白供籩豆。親見虞廷覽德輝。

王廷珪明堂侍祠詩。唱徹嚴更鳳鑰開。侍祠濟濟列崇陔。小臣亦忝廊西獻。惟秉溫恭對越來。玉佩

珊珊出禁扉。金蓮分炬散芳菲。祠班咫尺臨黃道。惹得天香滿袖歸。

集英殿策士之所。上御集英殿。拆號唱進士名。武林舊事。上御集英殿。唱進士名。狀元賜酒五盞。餘人

各賜泡飯。夢梁錄云。四月初九日。度宗生日。平章宰執親王南班百官入大內起居稱賀。隨班從駕過

皇太后起居畢。回集英殿賜宴。又云。士人殿試前三日。宣押知制誥詳定考試等官。赴學士院鎖院。命

御策題。然後宣約赴殿。士人詣集英殿起居。就殿廡賜坐。引試依圖分廡坐定。各賜印刊策題。

洪咨夔集英策士待宣於內軍器庫廊詩。漢廷興日策英豪。挽釣知誰首掣鰲。百日紅連綸閣迥。萬年

枝拂禁城高。內廊坐永風生席。輦路歸遲月映袍。西抹東塗渾忘卻。一絢短雪不堪搔。

劉燭瑞慶聖節集英殿宴。皇家卜世過周唐。天啓真人應運翔。抱日預占恭邸夢。飛龍曾報皖山祥。翠

雲影外來金母。紅霧香中擁玉皇。樂府賦工無以祝。願將金鑑代珠囊。

垂拱殿。紹興十二年十一月庚子。命內侍王晉錫作崇政垂拱二殿。時言者請復朔日觀朝之禮。而行

宮止一殿。故改作焉。夢梁錄云。垂拱殿常朝四參起居之地。聖節上坐垂拱殿。上壽禮畢。再坐紫宸殿。

宋史淳祐五年二月十二日。進孝宗光宗兩朝御集。寧宗實錄及理宗玉牒日歷。其日皇帝御垂拱殿。

提舉等官奉迎諸書至和寧門。步導至垂拱殿。各取合進呈書匣升殿。陳隨應行宮記。垂拱殿五門十

二架長六丈廣八丈四尺簷屋三門長廣各丈五朵殿四兩廊各十二間殿門三間內龍墀折檻殿後擁舍七間爲延和殿按殿址在鳳凰山麓卽報國寺又按考古錄云南白苕帶灣北至柳翠橋皆報國寺界則垂拱殿址可想見矣

任希夷侍班二首虎旅分行鐵作撾殿前拜舞□聲譁輔臣對罷無公事日照金鋪扇影斜闔闔新開露氣清舉鞭連騎入承明絲絢同傍瑤墀立廣殿前瞻御榻橫

內朝後殿

崇政殿卽祥曦殿淳熙六年與後殿同建陳隨應記云自北宮門循廊而左巨鎗幕次列如魚貫轉南爲祥曦殿朵殿西接修廊爲後殿武林舊事后出宮至祥曦殿上升龍檐出和寧門至皇后家賜筵宋史崇政殿說書故左史兼紹興二年万俟卨羅汝楫並兼講讀綱目紹興七年閏二月以尹焞爲崇政殿說書乾道二年十一月幸教場從駕臣僚自祥曦殿並戎服起居元史世祖遣伯顏入臨安宋主昀率文武百僚詣祥曦殿望闕上表乞爲藩輔

魏了翁後殿侍立須臾陞衛儼成行禁蹕聲聲輦出房靴笏趨陪西府拜卻更絲履立東廊

考宋史新編曰杭城大內卽州治也休兵後始作崇政垂拱二殿宮室志云垂拱崇政二殿雖曰大殿其修廣僅如大郡之設廳淳熙再修止循其舊宋史地理志云臨安宮室制度皆從簡省垂拱大慶文德紫宸祥曦集英六殿隨事易名實一殿也考臨安志垂拱祥曦係屬別殿當以親見爲不誣

延和殿 宋史宮室志淳熙八年秋改後殿擁舍爲別殿取舊名謂之延和殿便坐視事則御之宋史宗室子瀟傳孝宗嗣位志圖恢復子瀟練兵習爲鵠鶴魚麗陣上觀于便殿嘉之時臣撰後殿上梁文云聽朝決事兼汴都延和崇正之名論道談經殆炎漢虎觀金華之比史云孝宗作敬天之圖開延和之殿躬講讀之勤設補遺之官指此遇聖節長至正旦寒食大禮齋或避正殿則御焉考垂拱及後殿之後皆有此殿凡大禮齋宿於此亦稱東齋殿西齋殿大禮後擇日詣景靈宮等處行恭謝禮畢宣賜百官簪花于西齋殿七修類稿小仙林寺卽後殿在山岡遊覽志亦云卽延和殿也以舊紀殿址推之當在報國寺後

陸游延和殿退朝口號 雨餘未肯放朝暾穿仗恭承聖主恩清蹕傳聲徐御殿紫衣引拜許龍門徘徊漫結堯階戀零落難招楚澤魂歸去猶堪誇里巷桐江新賜雨朱轡十年短櫂樂滄波強著朝衫棄釣簑才薄何堪試馮翊恩深猶許對延和空墻煙柳遙迎馬輦路春泥欲濺鞦莫恨此身衰病去同時朝士久無多

福寧殿 行在所錄云御寢也紹興間禁中營祥曦福寧等殿福寧殿側有清暑樓乾淳歲時記立春前一日臨安府進大春牛設之福寧殿庭宋史留正傳孝宗疾革正數請車駕過宮一日上拂衣起正引裾泣諫隨至福寧殿正退上疏言極激切按遊覽志尊勝寺卽福寧殿細考尊勝寺係芙蓉閣址興元寺當爲福寧殿址舊志彼此互易宜從湖山便覽改正